

#### 第四節 小草池新築

④ 小草池新築碑（所在地 西尾市家武町小草三）



### 小草池新築碑

三河幡豆郡平原村之為地環之皆山也而澗水交注焉延寶年間板倉氏所管而保護得宜無復水害天和之後數易管主而近隣十有二邨亦各異所管是以數年間林木失守斬伐無度山遂成赭數流出土砂水路壅塞平原村以最接近被害亦多寶曆九年村有神取暉兒者慨然而起訴之幕府乞除其患害幕府嘉之使吏檢之暉兒周旋乎其間苦心焦慮至忘寢食遂使十有三邨聯合同盟連年出工夫三千零三十人以浚除蘓美川其程凡一里半強實寶曆十年十月也自此永以為例村民始免其害百二十余年干茲矣明治維新之後有各自分山林私有之者漸起異議舊約為之沮廢者五年平原家武之二村被其害者復如昔日明治十四季十一月二村戶長富田和十郎神取勘治深慨嘆之相謀訴之幡豆郡長長坂重孝君君贊成之以稟懸令國貞公公充可之乃命土木課長黒川治愿君檢實地諭村民除舊慣分山林而案地理鑿土砂以疏新川瀨違川等之水路更築土砂扞止之池其亘凡一丁余而植赭山以松三十萬株盡係懸廳所賜蓋固土砂扞止之根之此工起於明治十五年三月而至十六年一月竣功其役夫無非十三村照準舊約所出者而其工費二千九百九十二圓余屬地方稅三千九百七十一圓余屬協議費合計之則金六千九百六十四圓余也十六年一月二十日懸令國貞公率土木課長黒川治愿君郡長所重禮君來視成功召集二村戶長及筆生議員賀其竣工且戒以永續此業無闕公私之利益抑此功也雖出官民之同心戮力亦無非繼續昔日神取氏之遺緒者豈可使其功專於後人乎哉於是二村相議欲記其由以傳不朽乃以其概畧刻石建諸其池堤云

明治十七年十一月

平原村家武村人民記之